

SEGUN PARLAMENTARIO CROES

Dramamento di sanger : e yamada di MEP pa violencia

ORANJESTAD (IPA) — Parlamentario di MEP Sr. Rudy Croes na varios ocasion, inclusive na e ceremonia funebre pa Daniel Leo q.e.p.d, a expresa cu lo tin “dramamento di sanger” pa asina logra su meta, meta di MEP, esta Independencia na 1996.

“Nos a yega di tende e zonidonan aki den pasado caba y nos tur sa kiko esaki kiermen. Esaki a costa bida di un hoben prometedo, Alo Tromp. E dramamento di sanger aki no ta dirigi contra ningun grupo den

otro paisnan sino contra nos mes hendenan,” Sr. Tico Croes a remarca.

Sr. Tico Croes a sigi muestra cu esnan cu ta papia di violencia ta justamente esnan cu no tin argumentonan racional mas, pues tur loke ta sobranan ta amenaza, intimidacion y forza bruto.

“E yamada di MEP pa violencia ta un yamada na division, odio, rencor, venganza, lagrima, sufrimento, instabilidad y na “high risk”. E tendencia actual na Aruba a tuma rumbo peligroso na unda no tin respet pa otro su derechonan

mas. Nos sa cu e tendencianan aki den un independencia por conduci na un dictadura,” Sr. Tico Croes a bisa.

AVP ta contraresta e yamada di violencia di MEP cu palabranan sabio: “*El respeto al derecho ajeno , es la paz.*” Esakinan ta palabranan cu difunto lider di MEP tabata usa ora e tabata papia cu nos pueblo. AVP tampoco ta papia di sanger y violencia, sino di paz, harmonia, union y seguridad. Solamente ariba e basenan aki nos lo por construi un Aruba solido.